

Ni Pangulong Henry B. Eyring
Unang Manuglaygay sa Unang Panguluhan



Ang Promisa sang Pagliso sang mga Tagipusuon

Ang akon iloy, nga si Mildred Bennion Eyring, nagdako sa isa ka komunidad sang pagpanguma sa Granger, Utah, USA. Isa sang iya mga utod nga lalaki, nga si Roy, ang nagsunod sa palangabuhian sang pamilya sa pagsagod sang mga karnero. Sang lamharon pa sia, naghinguyang sia sang madamo nga mga semana malayo sa ila puluy-an. Sa pagligad sang panahon, amatamat nga nadula ang iya interes sa Simbahan. Sang ulihi, nagsaylo sia sa Idaho, Estados Unidos sang Amerika, nagpangasawa, kag nakaangkon sang tatlo ka kabataan. Napatay sia sa edad nga 34 sang ang iya asawa 28 anyos ang edad kag ang ila kabataan magagmay pa.

Bisan pa nga ang diutay nga pamilya ni Roy ato sa Idaho kag ang akon iloy nagsaylo mga 2,500 ka milya (4,025 ka kilometro) sa New Jersey, USA, masami sia nagapadala sa ila sang mga sulat sang pagpalangga kag pagpaisog. Ang pamilya sang akon tiyo mapinalanggaon nga ginatawag ang akon iloy nga si “Tiyay Mid.”

Madamo nga tinuig ang nagligad, kag isa ka adlaw nakabaton ako sang isa ka tawag gikan sa isa sang akon mga pakaisa. Ginsugiran ako nga ang balo ni Roy napatay na. Ang akon pakaisa nagsiling, “Gusto gid ni Tiyay Mid nga makahibalo ka.” Si Tiyay Mid madugay na nga napatay sadto, pero ang pamilya [sang akon tiyol] sa gihapon naka-batyag sang iya pagpalangga kag nagdab-ot sa pagpahibalo sa akon.

Nagpamensar ako kon paano gintungdan sang akon iloy ang responsibilidad sa iya pamilya kasubong sang responsibilidad sang Nefinhon nga mga propeta sa ila mga pamilya paagi sa pagpabilin nga malapit sa mga paryente nga luyag nila dalhon sa ebanghelyo ni Jesucristo. Si Nefi nagsulat sang isa ka rekord nga ginlauman niya nga magimpluwensya sa mga anak sang iya mga utod nga magbalik sa ginatuohan sang ila amay, nga si Lehi. Ang mga anak ni Mosias nagpakita sang amo man nga pagpalangga sa ila pagwali sang ebanghelyo sa mga kaliwat ni Lehi.

Ang Ginuo naghatawag sang mga pamaagi para sa aton nga mabatyagan ang pagpalangga sa sulod sang mga panimalay nga mahimo magpadayon sa katubtoban. Ang lamharon nga mga miyembro sa Simbahan karon nakabatyag sang ila mga tagipusuon nga nagaliso o nagaunikid sa ila mga pamilya. Nagapangita sila sang mga ngalan sang mga miyembro sang ila pamilya nga wala makaangkon sang oportunidad nga mabaton ang mga ordinansa sang kaluwasan sa sining kabuhi. Ginadala nila inang mga ngalan sa templo. Sa ila pagpabunyag, may kahigayunan sila nga mabatyagan ang pagpalangga sang Ginuo kag sang mga miyembro sang pamilya nga ila ginahikotan sang tal-os nga mga ordinansa.

Madumduhan ko pa ang pagpalangga sa tingug sang akon pakaisa nga nagtawag kag nagsiling, “Ang amon iloy napatay, kag si Tiyay Mid maluyag gid nga makahibalo ka.”

Kamo nga nagahikot sang mga ordinansa para sa mga miyembro sang pamilya nagadab-ot sa pagpalangga, kasubong sa mga anak nga lalaki ni Mosias kag sang propetang si Nefi. Pareho sa ila, makabatyag kamo sang kalipay para sa sadtong nagabaton sang inyo halad. Makapaabot man kamo nga mabatyagan ang pareho kadaku nga kalipay sang kay Amon, nga nagsiling parte sa iya pangmisionaryo nga pag-alagad sa tunga sang malayo nga mga himata:

“Gani, magkasadya kita, huo, magkasadya kita sa Ginuo; huo magkasadya kita, kay nalubos ang aton kalipay; huo dayawon naton ang aton Dios sa wala'y katubtulan. Yari karon, sin-o ang mahimo nga magkasadya sing tuman sa Ginuo? Huo, sin-o ang makahambal sing tuman kadamo nahanungod sang iya dako nga gahum, kag sang iya kaluoy, kag sang iya pagkamainantuson tuhoy sa mga anak sang tawo? Yari karon, ginasiling ko sa inyo, indi ko masiling ang pinakadiutay nga bahin nga akon ginabat-yag.” (Alma 26:16).

Nagasaki ko nga ang inyo mga balatyagon sang pagpalangga para sa mga miyembro sang inyo pamilya—bisan diin man sila—mga katumanan sang promisa nga si Elias magakari. Nagkari sia. Ang mga tagipusuon sang mga anak nagaliso sa ila mga ginikanan, kag ang tagipusuon sang mga ginikanan nagaliso sa ila mga anak (tan-awa sa Malaquias 4:5–6; Joseph Smith—History 1:38–39). Kon nagabatyag kamo sang kaluyag nga magpangita sang mga ngalan sang inyo mga katigulangan kag dalhon inang mga ngalan sa templo, nagabatyag kamo sang katumanan sinang panagna.

Isa ka bugay ang magkabuhi sa panahon nga ang promisa sang pagliso sang mga tagipusuon nagakatumuan. Si Mildred Benion Eyring nakabatyag sinang obligasyon sa iya tagipusuon. Ginpalangga niya ang pamilya sang iya utod nga lalaki, kag nagdab-ot sia sa ila. Nabatyagan nila ang ila mga tagipusuon nga nagliso sa pagpalangga kay Tiyy Mid bangud nakahibalo sila nga palangga niya sila.

PAGTUDLO GIKAN SA SINING MENSAHE

Ayhan luyag ninyo magbasa sang panagna parte sa espiritu ni Elias upod sa inyo ginabisitahan. (tan-awa sa Malaquias 4:5–6; Joseph Smith—History 1:38–39). Hambali ang mga paagi nga makapasakop sa family history,

kalakip na ang mga kasangkapan pareho sang indexing, photography, kag blogging. Kon ang inyo mga ginabisitahan wala pa makahisayod FamilySearch.org, huna-hunaa ang paghinguyang sang tion agud ipakita ang mga ini sa ila.

LAMHARON

Pagkilala sang Akon Lola

Ni Jewelene Carter

Para sa isa sang akon mga proyekto sa Young Women, nagboluntaryo ako nga magbulig sa akon lola sa pagpangita sang iya mga katigulangan paagi sa pagbasa sang madamo nga mga panid sang microfilm sa family history center sa Mesa, Arizona, USA. Samtang tupad kami nga nagapungko kag nagapangita sa amon mga himata, nagpamensar ako: “Kilala ko gid bala ang akon lola nga yara sa akon tupad?”

Madamo kami sing nakita nga mga miyembro sang pamilya, ginhanda ang ila mga impormasyon, kag nagkadto sa Mesa Arizona Temple agud maghikot sang ila bunyag kag kumpirmasyon. Wala madugayi pagkatapos sadto, ang akon lola ngahatag sa akon sang nabugkos nga koleksyon sang iya family history.

Bangud nagaantus sia sa rayuma, masakit kaayo para sa akon lola ang magmakinilya. Nalipay ako magbulig sa iya sa computer. Magkaupod namon nga ginasulat ang mga istorya gikan sa iya kabuhi para sa espirituhanon nga kaayuhan sang amon pamilya. Nanamian ako nga mangin kabahin sang iya kabuhi kag magtuon sing madamo kaayo parte sa kasaysayan sang Simbahan sa amon pagbuligay sa sining mga proyekto.

Ang tagsulat nagaistar na karon sa Virginia, Estados Unidos sang Amerika.

MGA KABATAAN

Gugma sa Balay

Ang langit 'gakalipay

Kon 'gahigugmaay;

Ang tanan 'gahangpanay

Kon 'gahigugmaay.

(“Love at Home,” Hymns, num. 294)

Gusto sang Amay nga Langitnon nga palanggaon naton ang aton mga pamilya agud nga kita mangin malipayon. Kon mas ginaalagaran naton ang aton mga pamilya, mas magadugang ang aton pagpalangga sa Amay nga Langitnon kag sa mga miyembro sang aton pamilya.

Magdrowing sang mga tagipusuon sa isa ka panid sang papel kag gunting-guntingon ang mga ini. Mag-sulat sang malipayon nga mga mensahe ukon magdrowing sang mga larawan sa mga ini kag sekreto nga ihatag sa mga miyembro sang inyo pamilya. Lantawa kon paano sila mapalipay sini!



Ang Langitnon nga Misyon ni Jesucristo: Mananabang

Tun-i sing mainampuon ining materyal kag magpangamuyo agud mahibaloan kon ano ang ipaambit. Paano ang paghangop sa kabuhi kag misyon sang Manluluwas makapadugang sang inyo pagtuo sa Iya kag magabugay sa ila nga inyo ginabantayan paagi sa visiting teaching? Para sa dugang nga impormasyon, mag-log on sa reliefsoociety.lds.org.

Pagtuo, Pamilya, Bulig

Kabahin ini sang sunod-sunod nga mga Mensahe sa Visiting Teaching nga nagapakita sang mga aspeto sang misyon sang Manluluwas.

Si Jesucristo amo ang aton Mananabang sa Amay. Ang tinaga nga mananabang naghulin sa Latin nga pulong nga nagakahulugan “isa nga nagaampo sa isa pa gid.”¹ Ang Manluluwas nagapakitluoy para sa aton, nga ginagamit ang pag-intiendi, hustisya, kag kaluoy. Ang paghibalo sini makapuno sa aton sang pagpalangga kag kapasalamat para sa Iya Pagpasag-uli.

“Magpamati kay [Jesucristo] nga amo ang aton mananabang sa Amay, nga nagapakitluoy para sa inyo sa iya atubangan—

“Nga nagasiling: Amay, tamda ang pag-antus kag kamatayon niya nga wala sing nahimo nga sala, nga sa iya ikaw tuman nga nahamuot; tamda ang dugo sang imo Anak nga ginpaagay, ang dugo niya nga imo ginsakripisyos agud nga ikaw mahimaya;

“Gani, Amay, kaluoyi ining akon mga kauturan nga nagapati sa akon ngalan, agud nga magakari sila sa akon kag makaangkon sang kabuhi nga wala'y katapusan” (D&C 45:3–5).

Nahanungod kay Cristo nga aton Mananabang, si Elder D. Todd Christofferson sang Korum sang

Napulo'g Duha ka mga Apostoles nagsiling: “Daku kaayo ang kahuligan sa akon, nga ako sa bisan ano nga tion kag bisaan ano nga kahimtangan makapalapit paagi sa pangamuyo sa trono sang kaluoy, nga ang akon Amay nga Langitnon mamati sa akon ginapangayo, nga ang akon Mananabang, sia nga wala sing may nahimo nga sala, nga ang iya dugo ginpaagay, magapangapin sang akon kawsa.”²

Gikan sa Balaan nga mga Kasulatan

Mosias 15:8–9; Moroni 7:28; Doctrine and Covenants 29:5; 110:4

Gikan sa Aton Kasaysayan

Sa kabug-osan sang kasaysayan sang Simbahan sang Ginuo, ang bayani nga mga disipulo ni Jesucristo nagaunod sa Iya ehemplo. Si Ester isa ka matutum kag maisog nga mananabang. Ang iya pakaisa nga si Mordecai naghatag sa iya sang ordinansa sang hari nga ang mga Judio pagapatyon, kag ginsugo niya sia nga “magpangabay sa atubangan [sang hari] para sa iya katawohan.” Dugang niya: “Kag sin-o bala ang nakahibalo nga ayhan nag-abot ka sa ginharian sa tion nga subong sini?” (Ester 4:8,14).

Wala sapayan sang peligro nga mangin mananabang sang iya katawohan, si Ester nagpasugot: “Niyan, magakadto ako sa pag-sulod sa hari, bisan indi suno sa kasuguan: kag kon mawala ako, mawala ako” (Ester 4:16).

Niyan si Ester naghambal sing mapainubuson sa atubangan sang hari kag “naghapa sia sa iya tiilan, kag nagpakiluoy sa iya nga may luha . . . sa pagbaylo sang mga sulat . . . sa paglaglag sang mga Judio.” Dugang niya, “Paano bala ang pagkabatas ko sa pagtan-aw sang malaut nga magaabot sa akon katawohan?” (tan-awa sa Ester 8: 3, 5–6). Ang tagipusuon sang hari natandog, kag ginhata niya ang iya ginapangayo.³

MGA TANDA

1. Tan-awa sa Russell M. Nelson, “Jesus Christ — Our Master and More” (Brigham Young University fireside, Feb. 2, 1992), 4; speeches.byu.edu.
2. D. Todd Christofferson, “I Know in Whom I Have Trusted,” *Ensign*, Mayo 1993, 83.
3. Tan-awa man sa *Daughters in My Kingdom: The History and Work of Relief Society* (2011), 180.

Binagbinaga Ini

Paano ang pagpanabang ni Jesucristo makainspirar sa aton nga magtanyag sang kaluoy kag kapatawaran sa iban?